

МЕСЯЦА НОЕМВРИЯ В 24-Й ДЕНЬ.

СВЯТЫЯ ВЕЛИКОМУЧЕНИЦЫ ЕКАТЕРИНЫ И СВЯТАГО ВЕЛИКОМУЧЕНИКА МЕРКУРИЯ

На Господи, возвах: стихиры святыя, глас 1.

Подобен: Небесных чинов:

Днесь красуется град Александрия, * пелены твоя, мученице, * в Божественном храме твоём имея премудро. * Темже и мы благочестно празднуем, * Екатерино, память твою честную: * молися о чтущих тя.

Екатерины память ныне празднуим: * та бо истинно вся вражия силы * и словом же и делом низложи крепко * и риторское противление. * Но молитвами ея избави ны, Боже, * от безбожных враг.

Радуйся, всеславная мученице Екатерино честная: * Синайская бо гора, * в нейже виде купину Моисей неопалиму, * в той Христос Богоугодное тело твое, * ныне преложив, хранит * даже до времени втораго пришествия Своего.

Ины стихиры мученика, глас 4.

Подобен: Яко добля:

Поборением Духа, страсотерпче Меркурие, * одолев противнаго, * яко воин непобедимый, * оружием веры тьмы разумных муринов посекал еси * и, совершив твой подвиг законно, * со всеми страдальцы венчался еси, * великомучениче преблаженне.

С Небесе тебе Ангел, * язвы твоя исцеляяй, * послан бысть манием Божественнаго Духа: * отнележе исцелев, достославне, * рожны прободаемь, льстивно разжженными, * терпел еси, повешен и протяжаемь, * и к камени привязаемь тяжкому, * и кровью твоими, мучениче, обливаемь всюду.

Царю воинствуя земному, Меркурие, * от негоже демоном повелеваемь жрети, * Богомудре блаженне, * муки претерпел еси, * и попаление огненное, и нуждную смерть, * и востекл еси ко Христу, венценосец, * и сочетался еси мучеников стадом, * о мире моляся.

Слава, глас 2:

Радостно к торжеству Богомудрыя мученицы Екатерины стецемся, * о мучениколюбцы! * И тую похвалами, яко цветы, увязем, * радуйся, вопоюще ей, * яже лживых риторов свирепоустие обличивши, * яко ненаказания исполненных, * и тыя к вере Божественней руководствовавши. * Радуйся, яже тело многоплетенным мукам вдавши * любви ради Творца твоего, * и не низложившися, яко отроковица негиблема. * Радуйся, яже горняя пребывалища, возмездие болезней наследовавши, * и славы вечныя наслаждаешися. * Еяже желающе, песнопевцы твои, * надежды да не отпадем.

И ныне, глас 8:

По Рождестве Твоём, Богоневесто Владычице, * пришла еси в храм Господень * воспитатися во святая святых, * яко освященна; * тогда и Гавриил послан бысть к Тебе, Всенепорочней, * пищу Тебе принося: * Небесная вся удивилася, * зряще Духа Святаго, в Тя всельшася. * Темже, Пречистая и нескверная, * яже на небеси и на земли славима, * Мати Божия, спаси род наш.

На литии стихиры, глас 1:

Яко на твердем камени * исповедания Христова, * водружена бывши, Екатерино всехвальная, * гонителя льстиваго во мраце погрузила еси * и венец победы достойный восприяла еси.

С Вышними чинми сочеталася еси, славная, * мир оставльши и Христа возжелевши, * Екатерино всечестная, * проси нам велия милости.

Глас 2:

Яко алавастр мира, * кровь твою принесла еси Жениху твоему, Христу, * Екатерино мученице, страстоносице непобедимая, * возмездие же прияла еси, * венец нетленный от Него, досточудная. * Темже и началозлобнаго врага * красными твоими ногами попрала еси, * призыванием спасеннаго Имене Иисуса Христа, * сего ради и в Небесных чертозах водворилася еси, * яко дева и мученица Христова многострадальная.

Глас 4:

Славим Твое многое, Христе, благоутробие, * и благость на нас бывшую, * яко и жены разрушиша леть идолобесия * силою Креста Твоего, Человеколюбче, * мучителя не убояшася, попраша льстиваго, * возмогоша же в след Тебе идти * и в воню мира Твоего потекоша, * молящеся о душах наших.

Слава, глас 6:

Одесную Спаса предста дева, * и страстоносица, и мученица Екатерина, * одяна в непобедимое добродетелей, * и приукрашена маслом чистоты и кровию страдания, * и вопиющи к Нему в радости, * свещу свою имущи: * в воню мира Твоего текох, Христе Боже, * яко уязвляюся Твоею любовию аз, * не отлучи мене, Женише Небесный. * Тоя молитвами, * послани нам, всеильне Спасе, милости Твоя.

На стиховне праздника, глас 1.

Подобен: Небесных чинов:

Приидите, празднлюбцы вси, * песньми почтим едину Богородицу * Чистую и Деву: * вводится бо в храм Божий, * в нем жити ныне светло, * святейший воистинну Христов храм, * и радости всякия Ходатаица.

Стих: Приведутся Царю девы в след Ея, * и искренния Ея приведутся Тебе.

Двери, пророче, отверзи, * верою приеми в храм Господень приведенную, * всех Ангел же и человек похвалу * и светло радование, * внутрь жити и ликовати, * яже храм Божий и обителище.

Стих: Приведутся в веселии и радовании, * введутся в храм Царев.

Богородица Мария, в храм приведена, * хлеб приемлющи от Ангела, явися, * вопиюща Ей, радуйся: * зачнеши Сына неискусомужно, * Богоневестная благословенная Богородице Дево, * земным благонаследие и название.

Слава, глас 2:

Житие невещественно навькши, * судище безбожное достигши, стала еси, * победоносице Екатерино честная, * цветоносящи Божию светлость; * и, Божественною мощию одяна, * повелению мучителю поругалася еси * и риторов утолила еси лживыя речи, многострадальная.

И ныне, праздника, глас 8:

Давид провозглашаше Тебе, Пречистая, * провидя освящение входа Твоего в храм: * в немже концы, днесь празднующе, * славословят Тя, Всепетая: * Яже бо прежде Рождества Дева * и по Рождестве пребывши нетленна, * Мати Слова Жизни. * Днесь в храме Захария веселится, * восприем Тя, Владычице, * и святая святых радуются, * подъемши Тя, источника жизни нашея. * Сего ради и мы псаломски вопием Ти: * о нас моли Сына Твоего и Бога нашего * даровати нам велию милость.

Тропарь мученице, глас 4:

Добродетельми, яко лучами солнечными, * просветила еси неверных мудрецы. * И, якоже пресветлая луна ходящим в нощи, * неверия тьму отгнала еси * и царицу уверила еси, * вкупе же и мучителя обличила еси, * Богозванная невесто, блаженная Екатерино, * желанием востекла еси в Небесный чертог * к прекрасному Жениху, Христу, * и от Него царским венцем венчалася еси: * Емуже, со Ангелы предстоящи, * за ны молися, * творящия пречестную память твою.

Слава, мученика, глас тойже:

Мученик Твой, Господи, Меркурий, * во страдании своем венец прият нетленный от Тебе, Бога нашего: * имеяй бо крепость Твою, * мучителей низложи, * сокруши и демонов немощныя дерзости. * Того молитвами * спаси души наша.

И ныне, праздника глас 4:

Днесь благоволения Божия предображение, * и человек спасения проповедание, * в храме Божии ясно Дева является * и Христа всем предвозвещает. * Той и мы велегласно возопиим: * радуйся, смотрения Зиждителя исполнение.

НА УТРЕНИ

На Бог Господь: тропарь праздника единожды, глас 4:

Днесь благоволения Божия преобразование, * и человек спасения проповедание, * в храме Божии ясно Дева является * и Христа всем предвозвещает. * Той и мы велегласно возопиим: * радуйся, смотрения Зиждителя исполнения.

И Екатерины, единожды, глас 4:

Добродетельми, яко лучами солнечными, * просветила еси неверных мудрецы. * И, якоже пресветлая луна ходящим в нощи, * неверия тьму отгнала еси * и царицу уверила еси, * вкупе же и мучителя обличила еси, * Богозванная невесто, блаженная Екатерино, * желанием востекла еси в Небесный чертог * к прекрасному Жениху, Христу, * и от Него царским венцем венчалася еси: * Емуже, со Ангелы предстоящи, * за ны молися, * творящая пречестную память твою.

Слава, мученика, глас тойже:

Мученик Твой, Господи, Меркурий, * во страдании своем венец прият нетленный от Тебе, Бога нашего: * имей бо крепость Твою, * мучителей низложи, * сокруши и демонов немощных дерзости. * Того молитвами * спаси души наша.

И ныне, праздника.

По 1-м стихословии седален святых, глас 8.

Подобен: Премудрости и Слова:

Кровей твоих струями, мученице Христова, * потоки благочестия выну содеваеши прехвальная, * одождением же благодатным словесных нивы напаяющи, * благодатию в них прозябаеши класы веры. * Темже преславно и по смерти явилася еси, * точащи живот мучения ради, * страстоносице прехвальная Екатерино, моли Христа Бога * согрешений оставление даровати * празднующим любовию святую память твою.

Слава, и ныне, праздника, глас 1.

Подобен: Камени запечатану:

Восхвалите, девы, матери, празднуйте, * людие, славословите, * священницы, благословите Пречистую Матерь Божию: * плотию бо младенствующи, прежде во храм принесены, * яко храм Божий святейший. * Темже праздник духовный совершающе, воспойм Ю, * яко Предстательницу рода человеческого.

По 2-м стихословии седален святых, глас 4.

Подобен: Вознесыйся:

Пришедшую ко Христу волею и украсившую добродетельми сердце, * Боголепно воспоем всемудрую Екатерину, верных множества, * та бо посрами мучительскую дерзость, * просиявши, яко солнце, посреди беззаконник, * и по кончине явися земным утверждение Божественное, вкупе и держава.

Слава, и ныне, праздника, глас 1.

Подобен: Камени запечатану:

Святая святых Богородице сущи, * достойно приведесе жити во святая, * яко одушевлен Господень кивот * и Святаго Духа истинно вместилище Божественное, Дево Мати: * темже вселися в Тя, иже Отцу Единородный и Святому Духу соестественный, * Твой Сын неискусомужно, обоготворив все человечество.

По полиелеи седален святых, глас 8.

Подобен: Премудрости и Слова:

Премудрость воистинну с Небесе, * усты Михаила Архангела приемши, мученице всехвальная Екатерино, * в страданиях непобедима, мудрость внешнею витиям посрамила еси, * мудростию же Божественною прелесть поплевала еси. * Темже, видяй подвиги твоя, Зиждитель предста, укрепляя тя: * гряди,— глаголя,— възыди, * сокровища бо ти готова. * Тому убо молися, согрешений оставление даровати, * празднующим любовию святую память твою.

Слава, и ныне, седален праздника, что по 3-й песни (*зри день сей ниже*).

Степенна, 1-й антифон, 4-го гласа.

Прокимен, глас 4: Дивен Бог во святых Своих:

Стих: В церквах благословите Бога:

Всякое дыхание:

Евангелие от Матфея, зачало 104.

Рече Господь притчу сию: уподобися Царствие Небесное десятиим девам, яже прияша светильники своя и изыдоша в сретение жениху, пять же бе от них мудры и пять юродивы. Юродивыя же, приемши светильники своя, не взяша с собою елеа, мудрыя же прияша елей в сосудех со светильники своими, коснящу же жениху, воздремашася вся и спяху. Полунощи же вопль бысть: се жених грядет, исходите в сретение его. Тогда восташа вся девы тья и украсиша светильники своя. Юродивыя же мудрым реша: дадите нам от елеа вашего, яко светилницы наши угасают. Отвещаша же мудрыя, глаголющя: еда како не достанет нам и вам, идите же паче к продающим и купите себе. Идущым же им купити, прииде жених, и готовыя видоша с ним на браки, и затворены быша двери. Последи же приидоша и прочыя девы, глаголющя: Господи, Господи, отверзи нам. Он же отвещав рече им: аминь глаголю вам, не вем вас. Бдите убо, яко не весте дне ни часа, в оньже Сын Человеческий приидет.

По 50-м псалме стихира, глас 2:

Девства твоего красоты * возжелев Царь Славы Христос, * яко непорочну ты невесту Себе обручи, * совокуплением нетленным, * ибже волею Своею, подав доброте твоей силу, * на враги же и страсти непобедиму показа, * претерпевши раны горькия и муки свирепыя, * сугубым венцем увязе тя * и постави одесную Себе, * яко царицу испещрену, * Того моли, мученице честная и многострадальная Екатерино, * певцем твоим спасение, и жизнь подати, * и велию милость.

Канон праздника, со ирмосом на 6 и святых два, на 8.

Канон праздника, глас 4.

Песнь 1

Ирмос: Отверзу уста моя, * и наполнятся Духа, * и слово отрыгну Царице Матери, * и явлюся, светло торжествуя, * и воспою, радуясь, Тоя вхождение.

Премудрости, Пречистая, Тя сокровище вемы и благодати, точащую источник приснотекущий разума, просим: Твои капли одожди, Владычице, еже воспевати Тя присно

Превышши, Пречистая, Небес бывши, храм и палата, в храм Божий возложила еси Тому уготоватися в Божественное Жилище пришествия Его

Свет возсиявши Богородица благодати, вся просвети и совокупи пресветлое Ея украсити торжество песньми: приидите, к Ней стеемся

Дверь славная, помыслы непроходимая, двери отверзши храма Божия, ныне повелевает нам, совшедшим, Божественных Ея чудес насладитися

Канон мученицы. Егоже краегранесие: Екатерину приснопамятную песньми пою. **Феофаново, глас 8.**

Песнь 1

Ирмос: Колесницегонителя фараона погрузи * чудотвори иногда * Моисейский жезл, крестообразно поразив * и разделив море: * Израиля же беглеца, пешеходца, спасе, * песнь Богу воспевающа.

Екатерины, всемудрыя мученицы, молитвами, Христе, мрачное око души моя просвети, зарю ми дая, Владыко, Твоего светолития, душетленных падений моих весь мрак потребляющую

Направляема Владыки, всемудрая, Божественными повелениями и Того любовию палима, потекла еси, к подвигом тщася, и мучителей разумы, Екатерино, устрашила еси словом, и мудростию, и благодатию

Управляема дланию, славная, крепкою Христовою, идольския бури избегла еси, мученице, немокренно преплывши креста ветрилом и Божественными ветры Духа, песнь Богу воспевающи

Радующися девственными добротами, Екатерино мудрая, и Божественное знание с Небесе имущи, лжеименного знания благодержно и мужественно предстатели посрамила еси, тыя державне победивши

Богородичен: Иже Богородицу Тя проповедует, Пречистая, всякия ереси отриновение имать: плоть бо бывша, неизменно родила еси превышша всякия, Богородительнице, твари Слово Божие Присносущное

Ин канон мученика, егоже краегранесие: Меркуриева ми крепость да хранит. **Иосиф, глас 8.**

Песнь 1

Ирмос: Посеченый несекомаго пресече, * и виде солнце землю, юже не виде, * лютаго врага вода потопа, * и непроходимое пройде Израиль. * Песнь же воспевашеся: * Господеви поим, славно бо прославися.

С горними лики, Меркурие, благих источнику, радуяся, предстоя, и Божественныя сладости, приснопамятне, исполняяся, любовию торжество твое совершающия сохраняй, Господу поющия: славно бо прославися

Вольно вшел еси в тризнице мучения, мудре, силою укрепляемъ Христовою, нас ради страсти спасительныя волею претерпевшаго плотию, и, радуяся, зывал еси: Господу поим, славно бо прославися

Глаголю мучителя яве укорил еси, исповеданием Христовым, блаженне, украшаемъ, и всякий болезней вид, веселися, претерпел еси, Меркурие, вопия тебе Укрепльшему: Господу поим, славно бо прославися

Богородичен: От Отроковицы Девы явился еси, воплощаемь нас ради, по нам Человек быв, и свидетеля верна страстей Своих являет – Меркурия, добляго Своего страдальца, Тому крепко поюща: Господу поим, славно бо прославися

Песнь 3

Ирмос: Твоя песнословцы, Богородице, * живой и независтный источниче, * лик себе совокупльшия, духовно утверди, * в честном вхождении Твоем * венцев славы сподоби.

Невестокраситель днесь явися, красный Девы храм и чертог, приемь одушевленный чертог Божий, чистую, и непорочную, и светлейшую всея твари

Давид, предначиная ликование, играет и ликовствует с нами и Царицу зовет Тя, украшену, Пречистая, предстоящу, Всечистая, в храме Царю и Богу

Из неяже преступление произыде древле роду человеческому, из Тоя исправление и нетление процвете, Богородица днесь приводима в дом Божий

Играют Ангельская воинства и всех человек множество, и пред лицом, Пречистая, предтекут Твоим днесь священосицы, зовуще: величества Твоя в дому Божиим

Ин мученицы.

Ирмос: Утверждаей в начале Небеса разумом * и землю на водах основавый, * на камени мя, Христе, заповедей Твоих утверди, * яко несть свят, паче Тебе, Едине Человеколюбче.

Вольными твоими стремленьми вошла еси ко страданию, волею Христа подражающеи и победивши светло тьмы миродержца, венценощица явилася еси, Екатерино Богоприятная

Крепостию ума обличила еси мучители, безбожия в глубине валяющияся, риторствующи яве Богознания догматы, Божию мудростию мученица уясняема всехваляная

Равнобожие во уши Евине пошептавый, от отроковицы младья ныне попирается, оружием бо Креста оградившися, посрами Екатерина мученица безмерно того хвалящаяся

Богородичен: Умерщвленный мой ум жизни действием из Тебе явльшиися миру воздвигни, язвы и струпы истребляющеи греховныя, едина Богородительнице Всенепорочная

Ин мученика,

Ирмос: Ты еси утверждение притекающих к Тебе, Господи, * Ты еси свет омраченных, * и поет Тя дух мой.

Весь разжигаемь Божественною любовию, славне, огонь и юзы, мечи и муки, якоже сон, вменил еси, Меркурие

Воспевал еси Сотворшаго, примешаяся лютым ранам, мучениче мудре, и исцеления язв принимал еси, славне

Жезлом укрепляемь Божественным, вражие свирепство, яко страдалец, мучениче доблемудренне, благомошно смирил еси

Богородичен: Яко да прообразит Твое паче ума, Чистая, рождество, купина явися, огнем палима, и никакоже сгарающеи

Кондак праздника, глас 4.

Подобен: Вознесыйся:

Пречистый храм Спасов, * многоценный чертог и Дева, * священное сокровище Славы Божия * днесь вводится в дом Господень, * благодать совводящи, * яже в Дусе Божественном, * Юже воспевают Ангели Божии: * Сия есть селение Небесное.

Икос: **Неизреченных** Божиих и Божественных таин зря, в Деве благодать являемую и исполняему явственно, радуясь, и образ разумети недоумеюся, странный и неизреченный, како избранная Чистая едина явися паче всея твари видимыя и разумеваема? Темже, восхвалити хотя Сию, ужасаюся зело умом же и словом, обаче дерзая, проповедаю и величаю: Сия есть селение Небесное

Ин кондак святыя, глас 3.

Подобен: Дева днесь:

Витийствующи днесь, Екатерина мученица * и витиям обличи умовредную ересь, * Ангел бо с Небесе к той прииде, силу от Вышняго принесе, * юже приемши, мужески рече: * Христос есть мучеником похвала.

Ин икос святыя: Светом Твоим, Христе, просвети сердце мое и Духом Твоим разшири ныне уста моя воспети достойно Твою страстотерпицу, та бо воистину, словом и благодатию, мудростию и духом ограждися, всем оружием Троицы Честныя множество обличи витийствующих, в суете хвлящихся, и сих приведе Тебе, Богови своему, Владыце и Спасу всех, вопиючи: Христос есть мучеником утверждение

Таже кондак Меркурия, глас 4.

Подобен: Явился еси днесь:

Во бранех непобедимаго воина * и в бедах непостыдна заступника, * песньми Меркурия ублажим, славяще, * празднуюция бо память его весело от бед избавляет и скорбей.

Седален святыя, глас 4.

Подобен: Вознесыйся:

Жениха твоего, Христа, возлюбивши, * свещу твою светло уготовавши, добродетельми просиявши, славная. * Темже вошла еси с Ним в Чертог * и, венец страдания от Него приемши, * от бед избави нас, совершающих, Екатерино, память твою.

Ин седален святыя, глас 4:

Лик составим духовно, братие, * премудрыя добрыя мученицы Екатерины верно, * Господеву взывающе: * слава Ти, просвещающая сердца человека, * слава Ти, почтый доблюю в страстех * тоя молитвами, Христе Боже, * спаси души наша.

Слава мученика, глас тойже.

Подобен: Скоро предвари:

Мученик Меркурий, подвизався, лъстиваго посрами * и венецник крепок Христов бысть: * темже Небесным ныне причтется ликом, * славы неприемныя достойно причащаяся. * Сего ради священную его память совершаем верно.

И ныне, праздника, глас тойже:

Давиде, предъиди в храм Божий * и, радуясь, прими Царицу нашу, и Той возопий: * вниди, Госпоже, в храм Царев, вниди! * Еяже слава покровенно разумеется, * из Неяже хочет источиться нам всем Свет – Христос.

Песнь 4

Ирмос: Неизследный Божий Совет, * еже от Девы воплощения, * Тебе, Вышняго, пророк Аввакум, усмотря, зовяще: * слава силе Твоей, Господи.

Аверь непроходную Божий дом приемля днесь, престати сотвори всякой службе законной, яко истинно явися, зовый, сущим на земли Истина

Гора присенная, Юже провиде древле Аввакум, предпропеда внутрь вместившуся, в неходных храма добродетелей процветши и покрывает концы

Видевши преславная вся земля странная же и дивныя вещи, како Дева от Ангела, пищу приемлющи, образы строения носит

Храм, и Палата, и Небо одушевленное явльшися, Богоневесто Царева, в храм законный приводима днесь, тому соблюдаема, Пречистая

Ин мученицы.

Ирмос: Ты моя крепость, Господи, * Ты моя и сила, * Ты мой Бог, Ты мое радование, * не оставь недра Отча, * и нашу нищету посетив. * Тем с пророком Аввакумом зову Ти: * силе Твоей слава, Человеколюбче.

Страдальческое, Екатерино, противление показала еси, мученице приснопамятная, враждебнику зело терпеливно противляющися и того поправши ногами красными Креста силою, страстоносице, мучеников похвала

Невеста Христова, Екатерино всеблаженная, явилася еси, Божественныя красоты световидными лучами просвещаемая и добротою сияющи Темже и, веселящися, песнопоеши Владыце: силе Твоей слава, Человеколюбче

Мучительскую гордыню низложила еси и Божественным словом мудрости твоя яко от глубины лестнаго демоноговения прельщаемыя исхитила еси, учащи звати Христу песнопующая: силе Твоей слава, Человеколюбче

Благославное и светоносное торжество славныя памяти твоя, всехвальная, крепко дерзость вражию поправши, яко солнце, возсия, в немже велегласно Владыце вопием: силе Твоей слава, Человеколюбче

Богородичен: Ныне крепость низложи отметающихся образа, Отроковице, поклонения Тебе, Чистыя, и паче ума из Тебе воплощеннаго и мир весь просвещшаго, и всех святых, верою же чтущия Тя просвети, едина Всепетая

Ин мученика,

Ирмос: Услышах, Господи, * смотрения Твоего таинство, * разумех дела Твоя * и прославих Твое Божество.

Присвоился еси Зиждителю твоему Божественнаго свидетельства, Богомудре, страстьми и светлыя венцы от Него приял еси, славне, яко непобедимый

Истканную от вышняго благодати в ризу, мучениче, ныне одеялся еси, тли и мертвосты риз, мучениче, совлекся

Даже до крове, славне, ко греху подвизався, победоносец показался еси и вышняго славы сподобился еси, Меркурие

Богородичен: На Тя спасительное Слово сниде, Приснодево, якоже туча, и изсуши многобожия наводнения

Песнь 5

Ирмос: Ужасошася всяческая * в честнем вхождении Твоем, * Ты бо, Неискусобрачная Дево, * внутрь вошла еси в храм Божий, * якоже чистейший храм, * всем воспевающим Тя * мир подавающая.

Священие славное и священное возложение, днесь Пречистая Дева, возложившись в храм Божий, Всецарю нашему Богу единому в жилище соблюдается, яко весть Сам

Доброту, Пречистая, души Твоя зря некогда, верою Захария возопи: Ты еси избавление, Ты еси всех радость, Ты еси воззвание наше, Еюже Невместный вмещен мне явится

О, паче ума чудес Твоих, Всечистая! странное Твое рождество есть, странен образ возвращения Твоего, странна и преславна Твоя, Богоневесто, вся и человеки несказанна

Свещник многосветлый сущи, Богоневесто, днесь возсияла еси в дому Господни и озаряеши ны честными дарованиями, Чистая, чудес Твоих, Богородице Всепетая

Ин мученицы.

Ирмос: Вскую мя отринул еси * от лица Твоего, Свете Незаходимый, * и покрыла мя есть чуждая тьма, окаяннаго, * но обрати мя и к свету заповедей Твоих * пути моя направи, молюся.

Любовию огнепалима, мученице всеславная, Владыки твоего и ищущи Того недомысленную доброту видети, самовольным нравом ранам себе вдала еси, девства сияющи благодатьми

Страстьми священнейшими, отроковице добродево, украсивши тебе самую благолепно, возшла еси к Небесному Христову чертогу и ныне светло твоему Жениху, веселящихся, сочталася еси, всеблаженная

Отроковица всесветлая явилася еси, возлюбивши Единого желаемого, и, во след Того крепчайшее течение совершивши, в волю мира твоего умнаго истощеннаго, вопияла еси: теку, Женише мой

Богородичен: Истинную Богородицу Тя вси познавше, Пречистая Владычице, из Тебе рождашася Бога Слова ведяще, проповедаем во дву существах, хотениях самовластных познаваема, Мати Богоневестная

Ин мученика,

Ирмос: Утреннююще, вопием Ти: Господи, спаси ны, * Ты бо еси Бог наш, * разве Тебе, иного не вемы.

Растягаемь и острою, Меркурие, неослабно разсекаемь, терпел еси, Божественными надеждами вжиляемь

Каменем мысленным укрепив твое сердце, каменем отягчаемь, не превратился еси, Меркурие славне

Сопричастник страстей Владыки твоего быв, славы приобщился еси Того и Божественныя светлости

Богородичен: Умертви, Дево, живуший мой грех, Жизнь рождающая, умертвившую смерть

Песнь 6

Ирмос: Божественное сие и всечестное * совершающе празднество, * Богомудрии, Богоматере, * приидите, руками воспоем, * от Нея рождающегося Бога славим.

Всяческая Носяй глаголом молитву праведных услыша, темже неплодныя разрешил еси недуг, яко Благоутробен, радости Виновную сим дарова

Сказати хотя Господь языком Свое спасение, Неискусобрачную ныне от человек прият, примирения знамение и обновления

Яко дом сущи благодати, в немже сокровища лежат неизреченнаго Божия строения, Всечистая, в храме причастилася еси нетленные сладости

Диадиму Тя царскую прием, храм, Богоневесто, просвещашеся и подступаше лучшим, предреченных зря на Тебе событие

Ин мученицы.

Ирмос: Бездна грехов и прегрешений буря мя смущает * и во глубину нужднаго реет мя отчаяния, * но Твою крепкую руку мне простри, яко Петрови, * о Управителю, и спаси.

Всю тя, добротой сияющую, девства зарею, мученическими же, отроковице, обогрени кровьюми, видеви, благое Слово и пречистое в чертогах Небесных тя всели

Возмогла еси Крестом мучителей разрушити державу, и мирския мудрости обличивши суету, Богодохновеннаго учения точащи догматы, велемудренная Екатерино приснопамятная

Лестию первее Адама райския сладости изгнавшего, ран болезни крепко терпящи, низложила еси на землю, мученице всеславная, и венцы Царствия венчалася еси

Богородичен: Милостива мне Судию и Сына Твоего, Богородице Дево, Твоими мольбами быти в день Суда, Избавителя же лютых, Мати, сотвори, к Тебе бо единой надежды возлагаю

Ин мученика,

Ирмос: Молитву пролию ко Господу * и Тому возведу печали моя, * яко зол душа моя исполнися * и живот мой аду приближися, * и молюся, яко Иона: * от тли, Боже, возведи мя.

Вжиляше ты присносущное Слово, за Него всяк вид мук, мучениче мудре, терпяща ты видя, и чрез Ангела дерзати повелеваше, Меркурие, и никакоже мучителей устрашитися противления

Умертвися многообразный змий и ногами попрося красными страдальца и добляго оружника, самовольными бо стремления вшеди к мучения ранам, смерти, славы исполнен

Всесовершенно Владыце принесл еси сердечное произволение, мучениче, и Того ради претерпев сломления, яко победитель от Него венчалася еси, и Тому ныне на Небесех со всеми мученики предстоиши, Меркурие

Богородичен: Зачала еси гласом Ангеловым Великаго Совета Ангела, Отроковице, и от Твоих пречистых кровей воплощенна, Всенепорочная, родила еси показавшаго всем Жизни входы за неизглаголанную милость

Кондак святыя, глас 2.

Подобен: Вышних ища:

Лик честный Божественне, мучениколюбцы, * воздвигните ныне, почитающе всеумдную Екатерину, * сия бо в тризнице Христа проповеда * и змия попра, риторов разумы укротивши.

Икос: От Бога мудрость приимши издетства, мученице, и внешнею добре мудрость всю извыче, познавши убо от тоя стихий движение же и творение по слову, и сия из начала словом Сотворшаго, Тому благодарение в нощи и во дни приношаше, идолы низложивши и сим несмысленно служащия риторов разумы укротивши

Песнь 7

Ирмос: Не послужиша твари Богомудрии * паче Создавшаго, * но огненное прещение мужески поправше, * радовахуся, поюще: * препетый отец Господь и Бог, благословен еси.

Се днесь возсия концем весна радостная, просвещающи нашу душу, и помышление, и ум благодатию, торжеством Богородицы днесь таинственно да учредимся

Да дароносят днесь всяческая Царице Матери Божии, Небо и земля, и Ангелов чини, и человеков множество и да вопиют: во храм вводится радость и избавление

Писание мимотече, и оскуде закон, якоже сень, и благодати лучи возсияша в храм Божий вшедшей, Тебе, Дево Мати Чистая, в нем благословенная

Повинися Рождеству Твоему, Всечистая, яко Творцу и Богу, Небо, и земля, и преисподняя, и всяк язык земных исповедает, яко Господь явился, Спас душ наших

Ин мученицы.

Ирмос: Божия снизхождения * огонь устыдеса в Вавилоне иногда, * сего ради отроцы в печи радованною ногою, * яко во цветнице, ликующе, пояху: * благословен еси, Боже отец наших.

Мучеников хвала, благочестия учительница была еси, светлому твоему Жениху мучеников множество приведши, Христу С нимиже зовещи, всехвальная, поющи: благословен Бог отец наших

Слово твое премудрое ко спасению многи исхити от идолонействовства и светоносны яви мученики, велегласно с тобою зывающия: благословен Бог отец наших

Отроковица, в след Тебе идуци, Тебе приведеса, мечем посечена, Твою подражающи страсть пречистую и Тебе, Зиждителю, вопиющи и глаголющи: благословен Бог отец наших

Богородичен: Святых Святый, в Тебе свято вселився, Чистая Богородице Дево, воплощен, из Тебе раждается, за еже спасти верою зовущия: благословен Бог отец наших

Ин мученика,

Ирмос: Отроцы еврейстии в печи * попраша пламень дерзновенно * и на росу огонь преложиша, вопиюще: * благословен еси, Господи Боже, во веки.

Светом горняго просвещения озаряемь, доблий воине, воспевающия тя ныне просвещаещи, песнопующия: благословен еси, Господи Боже, во веки

Воспевал еси всех Благодетеля, распаляемь Того ревностию, блаженне, и огнем чувственным жегомь, и песнопоя: благословен еси, Господи Боже, во веки

Камению приносящии честь, иже чувство окаменено имуще, камением, мучениче, отягчают выно твою, вопиюща, Меркурие: благословен еси, Господи Боже, во веки

Кровьми кровь смесив твою честную Владыки Человеколюбца, общник Того явился еси страстей, вопия, Меркурие: благословен еси, Господи Боже, во веки

Богородичен: Чини Ангельстии ужасаются таинства Твоего глубине, Богородице: Бог бо из Тебе воплощен явился, Емуже песнопоем: благословен еси, Господи Боже, во веки

Песнь 8

Ирмос: Слыши, Отроковице, Дево Чистая, * да речет убо Гавриил совет Вышняго древний истинный: * буди к приятию готова Божию, * Тобою бо Невместимый с человеки поживе. * Тем и, радуясь, вопию: * благословите, вся дела Господня, Господа.

Пречистый храм в дом Божий приводящи, Анна иногда, вопиющи с верою, рече священнику: чадо, от Бога данное мне, приим, ныне введи во храм Зиждителя Твоего и, радуясь, пой Ему: благословите, вся дела Господня, Господа

Рече, видев, Анне иногда Духом Захария: Жизни Матерь вводиши истинную, Юже светло пророцы Божии Богородицу проповедаша, и како храм вместит Ю? Тем, чудясь, вопию: благословите, вся дела Господня, Господа

Раба Божия бых аз, отвеца Анна ему, призывающии сего верою и молитвою прияти моя болезни плод, по приятии же рожденную привести Давшему Ю Тем, зовя, вопию: благословите, вся дела Господня, Господа

Законное воистинну дело есть, священник рече ей, странну же весьма вещь поразумеваю, зря приводимую в дом Божий, преславно превосходящую святая благодатию Тем и, радуясь, вопию: благословите, вся дела Господня, Господа

Ин мученицы.

Ирмос: Седмерицею пещь * халдейский мучитель * Богочестивым неистовно разжже, * силою же лучшею спасены, сия видев, * Творцу и Избавителю вопияше: * отроцы, благословите, * священницы, воспойте, * людие, превозносите во вся веки.

Твоими учении царица, верующи, притече ко благочестию, и крепко претерпевши болезней чувство, и Царствия Небеснаго непреемнаго явственно сподобися, вопиющи Владыце: священницы, благословите, людие, превозносите во вся веки

С мученики да будут верных прошения, страстотерпица бо Христу предстоит, просящи лучшая и спасения ходатайственная всевятую и честную ея память усердно совершающим и верно песнопующим: людие, превозносите Христа во веки

Отверз, приемлет тя Жених, всемудрая, двери райския, и в чертозе всесветлем обитати сотвори, царствия причастницу яко сообщницу страстей являет Емуже ныне предстоящи, царева дщи, светло украшена, нас не забуди

Ухищренными глаголы искушаше мучитель, и увелливословии, лютый, льстя, разслабити твою крепость надевша, славная, но уневеститися Христу хотящи, вопияла еси Владыце: священницы, воспойте, людие, превозносите Христа во веки

Богородичен: Священнейши была еси, Богородице всенепорочная, премирнаго Ангелов чина: сих бо родила еси Содетеля и Господа от девственных и неискусобрачных утробы, во двух существах неслиянно и невращно, во единой же Ипостаси Бога воплощенна

Ин. Ирмос тойже.

Страдальцев прилог тя лик прияше, украшена и светла бывша честными красотами пречестных твоих страданий и благочестиваго твоего и честнаго свидетельства, и ныне вопиеша непрестанно: священницы, благословите, людие, превозносите Христа во веки

Благочестивомудренно, славне, подвиг совершил еси, и доблемудренно врага посрамил еси, и, победу небесную яко победитель взял, со Ангельскими ныне лики веселишися, с нимиже, вопиеша непрестанно: священницы, благословите, людие, превозносите Христа во веки

Скончався, всеблаженне, мечем, Меркурие, и получив желаемого ти подлежащаго конца, землю убо кровными излиянии напоил еси, победоносное же и блаженное тело белейше снега показал еси, поя: священницы, благословите, людие, превозносите Христа во веки

Богородичен: Яко нашего суци воздания, Пречистая, вси виновную, вернии, поем Тя, Бога бо всевиновнаго паче вины родила еси, сокрушившийся образ злобою, Своим благоутробием наздавшего, едина Преблагословенная и обрадованная

Песнь 9

Ирмос: Яко одушевленному Божию кивоту * да никакоже коснется рука скверных, * устне же верных Богородице немолчно, * глас Ангела воспевающе, с радостию да вопиют: * истинно вышши всех еси, Дево чистая.

Яко пресветлую, Богородице чистая, душевныя чистоты имущи доброту, благодатию же Божиею исполняема с Небесе, светом присносущным просвещаеша всегда с веселием вопиющия: истинно вышши всех еси, Дево чистая

Прелетает, Богородице чистая, чудо Твое силу словес, тело бо в Тебе поразумеваю паче слова, течения греховнаго неприятно Темже благодарственно воию Ти: истинно вышши всех еси, Дево чистая

Преславно прообразоваше, Чистая, закон Тя скинию и Божественную стамну, странен кивот, и катапетасму, и жезл, храм неразрушимый и дверь Божию Темже научают Тебе звати: истинно вышши всех еси, Дево чистая

Песнопоя Тебе, провозглашаше Давид, глаголя Тя Дщерь Цареву, красотою добродетелей одесную предстоящую Бога, видев Тя упещрену Темже, пророчествуя, вопиаше: истинно вышши всех еси, Дево чистая

Ин мученицы.

Ирмос: Ужасеся о сем Небо, * и земли удивися концы, * яко Бог явися человеком плоти, * и чрево Твое бысть пространнейшее Небес. * Тем Тя, Богородицу, * Ангелов и человек чиновачалия величают.

Преставилася еси к Чертогом световидным, невестными украшена утварми, девственную имущи свещу в твоей деснице, в другой же держащи отсеченную твою главу И ныне, предстоящи Христу, твоему Жениху, Тя поющия сохрани

Прията бысть твоя, Богомудрая, молитва, верою бо твое именующия имя, честная, спасает Владыка от искушений и благодравие подает, недугов избавляя всеразличных, душевных же и телесных Тем тя, веселящися, Екатерино, убожаем

Пристала еси тихому пристанищу ныне, благоопратно же и легко море мирское, мученице, преплывши треволений, не искусившия, всемудрая, богатство многообразное Христу приносящи, дево, множество мученик, Екатерино всеблаженная

В чертозах Небесных ныне внутри с девственных лики ликовствующи, мученическими озаряема лучами, Екатерино всемудрая, разреши падений моих пленицы, усердно молящи всех Благодетеля, за Егоже кровь твою излила еси

Богородичен: Явилася еси, о Дево Мати Божия! паче естества рождши в телеси благое Слово, Егоже от сердца Своего Отец отрыгне прежде всех веков, яко благ, Егоже ныне и телес превышша разумеваем, аще и в тело облечеса

Ин мученика,

Ирмос: Устрашися всяк слух неизреченна Божия снизхождения, * яко Вышний волею сниде даже и до плоти, * от девического чрева быв Человек. * Темже пречистую Богородицу, вернии, величаем.

Гноеве мученчестии благовоние ныне испуцают благодатию и злосмрадныя наша страсти неизреченным словом отгоняют, и источают кости врачеваний воды и напаяют души поющих тех чудодейния

Яко велика столпа Христовы Церкви священо тя почитаем, яко стену непоколебимую, яко град воистинну, мучениче, непленяемый, яко воина крепка Бога Всецаря, яко потребителя врагов, яко светильника, умнаго и всемирнаго

Сошественника Ангела света к страданию, Богомудре, получил еси, темже терзаемь, и свещами поджигаемь, и отсекаемь люте, и мечем посекаемь, не утрашилсися еси, страсотерпче Христов доблественнейше

День, полн просвещения, веселия и радости, нам возсия – Божественная память твоя, тебе чтущим, мучениче Меркурие, в немже поминай нас, память твою творящих, и лютых искушений, и бед, и страстей ны избави

Богородичен: Просвети, Двере Света, ослепшую душу мою страстьми, и лукавыми помыслы омрачившуюся, и бедствующую, и избави мя искушений, бед и скорбей, да славлю Тя, надежду верных и утверждение

Светилен святя.

Подобен: Духом во святилици:

Возжиляема мудрованием жен, о дево Екатерино всечестная, * страсотерпщев славо, философов хитрость о Бозе обличила еси, * яко буюсловие сущу и баснь, * всенепорочную истинно Матерь Божию спомощницу стяжавши.

Слава, и ныне, праздника.

Подобен: Учеником зрящим:

Ангельстии чини и мученический лик празднует днесь с нами * в Божественном введении Богоотроковицы и Матере Господни * от Иоакима же и Анны, * вкупе твердаго Меркурия и преславныя Екатерины. * Ихже молитвами обрести нам оставление многих согрешений, молимся.

На хвалитех стихиры на 4, глас 4.

Подобен: Дал еси знамение:

Память всесвященную, Екатерино всехвальная, * честнаго твоего страдания совершающе, * славим во гласех непрестанных * даровавшего терпение тебе твердое, * и победоносну тя показавшаго, * и слово тебе подавшаго, устрашающаго риторы, * Иисуса Человеколюбца, и Спаса, и Господа. [Дважды.]

Мученице самовольная, * Екатерино всеславная, явилася еси, * мучителя благомощно обличивши * и лютое неистовство многобожия * Богознания сиянием низлагающи * и Божественною благодатию. * Отонудуже, и яко мученицу, и яко деву непорочну, * Христос венча, Спас душ наших.

Благодать Духа, Екатерино всеславная, * отвержением уст прияла еси, * очистивши тебе самую житием, * и помыслом терпеливным * мучителей гордость попрала еси, * и доброте телесной душевную красоту * Богомудренне предпочла еси, * страдальцев удобрение.

Слава, глас 2. Вавилы монаха:

Житие невестественно навывши, * судище безбожное достигши, * стала еси, победоносице, Екатерино честная, * цветоносящи Божию светлость * и Божественною мощию одеяна, * повелению мучителю поругалася еси * и риторов уголила еси лживыя речи, многострадальная.

И ныне, глас 6. Сергия Агиополита:

Днесь, собори верных, сошедшеся, * духовне да торжествуем * и Богоотроковицу Деву и Богородицу, * в храм Господень приводиму, * благочестно восхвалим, * предъизбранную от всех родов * во обителище всех Царя Христа и Бога; * девы, свечи носяще, предъидите, * Приснодевы чтуще честное происхождение; * матери, печаль всю отложивше, * радостно последуйте Матери Бога бывающей * и радости мира Ходатаице. * Все убо радостно, еже радуйся, * со Ангелом возопиим Обрадованней, * присно молящейся о душах наших.

На стиховне стихиры, глас 2.

Подобен: Доме Евфрафов:

Свет Тя трисиянный вжегши, Богородице, * в храме славы Небесную Ти пищу посылает, * величая Тя.

Стих: Приведутся Царю девы в след Ея, * и искренния Ея приведутся Тебе.

Из корене убо Давидова прозябла еси, Дево, * Гавриил, Тебе радость принося, вопияше: * Бога родиши, Пречистая.

Стих: Приведутся в веселии и радовании, * введутся в храм Царев.

Благо же священному и Божественному сопряжению Иоакима и Анны, * из нихже Чистая родися, * приведена бысть ныне Творцу Своему.

Слава, и ныне, тойже:

Двери Небесныя, восприимите Деву Марию, * неискусомужную, чистую Богородицу, * из Неяже человеком избавление.

НА ЛИТУРГИИ

Блаженны праздника, песнь 7-я и 8-я, на 4 и святых, песнь 6-я.

Се днесь возсия концем весна радостная, просвещающи нашу душу, и помышление, и ум благодатию, торжеством Богородицы днесь таинственно да учредимся

Да дароносят днесь всяческая Царице Матери Божии, Небо и земля, и Ангелов чини, и человеков множество и да вопиют: во храм вводится радость и избавление

Пречистый храм в дом Божий приводящи, Анна иногда, вопиющи с верою, рече священнику: чадо, от Бога данное мне, приим, ныне введи во храм Зиждителя Твоего и, радуясь, пой Ему: благословите, вся дела Господня, Господа

Рече, видев, Анне иногда Духом Захария: Жизни Матерь вводиши истинную, Юже светло пророцы Божии Богородицу проповедаша, и како храм вместит Ю? Тем, чудясь, вопию: благословите, вся дела Господня, Господа

Всю тя, добротую сияющу, девства зарею, мученическими же, отроковице, обагрену кровьми, видев, благое Слово и пречистое в чертозах Небесных тя всели

Возмогла еси Крестом мучителей разрушити державу, и мирския мудрости обличивши суету, Богодохновеннаго учения точащи догматы, велемудренная Екатерино приснопамятная

Слава: Лестию первее Адама райския сладости изгнавшего, ран болезни крепко терпящи, низложила еси на землю, мученице всеславная, и венцы Царствия венчалася еси

И ныне: Богородичен: Милостива мне Судию и Сына Твоего, Богородице Дево, Твоими мольбами быти в день Суда, Избавителя же лютых, Мати, сотвори, к Тебе бо единой надежды возлагаю

Тропарь праздника глас 4:

Днесь благоволения Божия предображение, * и человеков спасения проповедание, * в храме Божии ясно Дева является * и Христа всем предвозвещает. * Той и мы велегласно возопиим: * радуйся, смотрения Зиждителява исполнение.

Тропарь Екатерины, глас 4:

Добродетельми, яко лучами солнечными, * просветила еси неверных мудрецы. * И, якоже пресветлая луна ходящим в нощи, * неверия тьму отгнала еси * и царицу уверила еси, * вкупе же и мучителя обличила еси, * Богозванная невесто, блаженная Екатерино, * желанием востекла еси в Небесный чертог * к прекрасному Жениху, Христу, * и от Него царским венцем венчалася еси: * Емуже, со Ангелы предстоящи, * за ны молися, * творящая пречестную память твою.

Тропарь мученика, глас 4:

Мученик Твой, Господи, Меркурий, * во страдании своем венец прият нетленный от Тебе, Бога нашего: * имеяй бо крепость Твою, * мучителей низложи, * сокруши и демонов немощныя дерзости. * Того молитвами * спаси души наша.

Кондак Меркурия, глас 4.

Во бранех непобедимаго воина * и в бедах непостыдна заступника, * песньми Меркурия ублажим, славяще, * празднующия бо память его весело от бед избавляет и скорбей.

Кондак святыя, глас 2.

Лик честный Божественне, мучениколюбцы, * воздвигните ныне, почитающе всемудрую Екатерину, * сия бо в тризнице Христа проповеда * и змия попра, риторов разумы укротивши.

Ин кондак святыя, глас 3.

Витийствующи днесь, Екатерина мученица * и витиям обличи умовредную ересь, * Ангел бо с Небесе к той прииде, силу от Вышняго принесе, * юже приемши, мужески^м рече: * Христос есть мучеником похвала.

Кондак праздника, глас 4.

Пречистый храм Спасов, * многоценный чертог и Дева, * священное сокровище Славы Божия * днесь вводится в дом Господень, * благодать совводящи, * яже в Дусе Божественном, * Юже воспевают Ангели Божии: * Сия есть селение Небесное.

Прокимен, глас 4: Дивен Бог во святых Своих, * Бог Израилев.

Стих: В церквах благословите Бога, Господа от источник Израилевых.

Апостол ко Ефесеим, зачало 233.

Братие, возмогайте о Господе и в державе крепости Его, облецытесь во вся оружия Божия, яко возможи вам стати противу кознем диавольским, яко несть наша брань к крови и плоти, но к началом и ко властем и к миродержителем тмы века сего, к духовом злобы поднебесным. Сего ради примите вся оружия Божия, да возможете противитися в день лют и вся содеявше стати. Станите убо препоясани чресла ваша истиною, и оболкшеся в броня правды, и обувше нозе во уготовление благовествования мира, над всеми же восприимше щит веры, в немже возможете вся стрелы лукаваго разжженные угасити. И шлем спасения восприимите, и мечь духовный, иже есть Глагол Божий.

Аллилуя, глас 1: Воззваша праведнии, и Господь услыша их.

Евангелие от Луки, зачало 106.

Рече Господь Своим учеником: внемлите от человек, возложат на вы руки своя и ижденут, предающе на сонмища и темницы, ведомы к царем и владыкам, имене Моего ради, прилучится же вам во свидетельство. Положите убо на сердцах ваших, не прежде поучатися отвечавати. Аз бо дам вам уста и премудрость, ейже не возмогут противитися или отвечаати вси противляющиися вам. Предани же будете и родители и братиею и родом и други, и умертвят от вас. И будете ненавидими от всех имене Моего ради. И влас главы вашей не погибнет. В терпении вашем стяжите души ваша.

Причастен: Радуйтесь, праведнии, о Господе: